

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**MIŠLJENJE**

**na Prijedlog Pravilnika o uvjetima za obavljanje energetske djelatnosti proizvodnje i  
isporuke toplotne energije**

**Sarajevo  
Srpanj, 2024. godine**



Broj: 07-26-7-008-6/24  
Sarajevo, 01.07.2024. godine

Na temelju članka 25. stavak (2) Zakona o konkurenciji („Službeni glasnik BiH“, broj 48/05, 76/07 i 80/09), postupajući po zahtjevu za mišljenje Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo, Konkurencijsko vijeće Bosne i Hercegovine je na 9.(devetoj) sjednici održanoj dana 01.07.2024. godine, donijelo

### **M I Š L J E N J E**

Konkurencijsko vijeće Bosne i Hercegovine (u daljnjem tekstu: Konkurencijsko vijeće) je dana 02.04.2024. godine pod brojem: 07-26-7-008-1/24 zaprimilo Zahtjev za mišljenje na Nacrt Pravilnika o uvjetima za obavljanje energetske djelatnosti proizvodnje i isporuke toplotne energije (u daljnjem tekstu: Zahtjev), Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo, Reisa Džemaludina Čauševića br. 1, 71 000 Sarajevo (u daljnjem tekstu: Ministarstvo ili Podnositelj zahtjeva).

Uvidom u odredbe Nacrta Pravilnika o uvjetima za obavljanje energetske djelatnosti proizvodnje i isporuke toplotne energije ( u daljnjem tekstu: Nacrt Pravilnik), Konkurencijsko vijeće je utvrdilo sljedeće:

Odredbe Nacrta Pravilnika primjenjuju se na pravne osobe koja obavljaju energetska djelatnost propisanu Uredbom o općim uvjetima za proizvodnju, isporuku i korištenje toplotne energije ("Službene novine Kantona Sarajevo“, broj: 22/16 i 4/23).

Nacrtom Pravilnika se propisuju uvjeti i postupak za izdavanje, produljenje i prestanak važenja Uvjerenja za obavljanje energetske djelatnosti (uvjerenje), oblik, sadržaj i način vođenja registra izdanih i oduzetih uvjerenja, kao i to da postupak izdavanja, produženja i prestanka važenja uvjerenja vodi Ministarstvo koje uspostavlja i vodi javni registar izdanih i oduzetih uvjerenja.

U članku 5. Nacrta Pravilnika su propisani opći uvjeti za obavljanje energetske djelatnosti:

„ (1) Uvjerenje za obavljanje energetske djelatnosti izdaje se pravnoj osobi koja je registrirana kod nadležnog suda za obavljanje energetske djelatnosti i ima upisanu pretežitu djelatnost prema trenutno važećoj Klasifikaciji djelatnosti Bosne i Hercegovine (KD BiH 2010) - 35.30 Proizvodnja i opskrba parom i klimatizacija.

(2) Uvjerenje za obavljanje energetske djelatnosti neće se izdati pravnoj osobi:

- a) nad kojim se vodi postupak likvidacije,
- b) ako se protiv odgovorne osobe ili članova uprave vodi krivični postupak
- c) ako su odgovorna osoba ili članovi uprave pravne osobe u posljednjih pet godina pravosnažno osuđeni za krivično djelo u svezi sa obavljanjem gospodarske djelatnosti za koju se zahtijeva izdavanje uvjerenja,
- d) ako je odgovornoj osobi ili članovima uprave podnositelja zahtjeva za izdavanje uvjerenja izrečena mjera zabrane obavljanja gospodarske djelatnosti za koju se zahtijeva izdavanje uvjerenja,

e) kojem je oduzeto uvjerenje za obavljanje energetske djelatnosti u posljednjih pet godina koje prethode godini podnošenja zahtjeva.“

Propisano je da je pravna osoba, podnositelj zahtjeva za izdavanje uvjerenja, u obvezi ispuniti posebne uvjete koji se tiču tehničke sposobnosti, stručne osposobljenosti i financijske sposobnosti za obavljanje energetske djelatnosti u smislu odredbi članka 6. Nacrta Pravilnika.

Članak 7. Nacrta Pravilnika propisuje tehničku sposobnost za obavljanje energetske djelatnosti:

„(1) Pravna osoba je tehnički sposobna za obavljanje energetske djelatnosti ukoliko raspolaže toplifikacionim sustavom, te uporabnom dozvolom i drugom dokumentacijom prema propisima kojima se uređuje područje prostornog uređenja i građenja na osnovu kojih se toplifikacioni sustav može staviti u pogon i koristiti za obavljanje energetske djelatnosti

(2) Pravna osoba može toplifikacioni sustav ili dio toplifikacionog sustava iz stavka (1) ovog članka imati u svom vlasništvu ili ga koristiti na temelju ugovora o zakupu ili drugog ugovora zaključenog sa vlasnikom.

(3) Pravna osoba dužna je uz zahtjev za izdavanje uvjerenja za obavljanje energetske djelatnosti dostaviti ministarstvu dokaz o vlasništvu ili ugovor/ugovore iz stavka (2) ovog članka.“

Stručna osposobljenost za obavljanje energetske djelatnosti je propisana člankom 8. Nacrta Pravilnika:

„(1) Pravna osoba je stručno osposobljena za obavljanje energetske djelatnosti ako zapošljava dovoljan broj stručno osposobljenih radnika za obavljanje energetske djelatnosti i/ili ima zaključene ugovore sa drugim pravnim osobama stručno osposobljenim za obavljanje energetske djelatnosti.

(2) Pod stručno osposobljenim radnicima iz stavka (1) ovog članka smatraju se uposlenici odgovarajuće kvalifikacije odgovorni za rad i nadzor nad radom toplifikacionog sustava kojim se obavlja energetska djelatnost sukladno zakonskim propisima, standardima i tehničkim propisima koji sa pravnom osobom koje je podnijelo zahtjev za izdavanje uvjerenja imaju zaključen ugovor o radu.

(3) Pravna osoba iz stavka (1) mora imati najmanje jednog tehničkog rukovodioca koji mora biti diplomirani inženjer odgovarajuće tehničke struke koji posjeduje neophodno znanje iz oblasti projektovanja, izgradnje, pogona i održavanja termoenergetskih objekata za proizvodnju i distribuciju toplotne energije sa položenom stručnom ispitom iz odgovarajuće oblasti.

(4) Pravna osoba iz stavka (1) mora imati dovoljan broj stručno osposobljenih radnika za rukovanje termoenergetskim objektima sa obrazovanjem prema zahtjevima stručnih zadataka, a sukladno sa važećim zakonskim propisima i tehničkim pravilima.

(5) Pravna osoba iz stavka (1) mora imati dovoljan broj stručno osposobljenih radnika za održavanje i servisiranje termoenergetskih objekata sukladno sa vrstom ugrađene opreme, zakonskim propisima i tehničkim pravilima.

(6) Za potrebe utvrđivanja dovoljnog broja stručno osposobljenih radnika iz stavka (4) i stavka (5) ovog članka mogu se uzeti u obzir uposlenici odgovarajuće stručnosti koji poslove obavljaju u razmjernom dijelu svog ukupnog radnog vremena ovisno od opsega obavljanja energetske djelatnosti.

(7) Pravna osoba koja je podnijela zahtjev za izdavanje uvjerenja za obavljanje energetske djelatnosti može za potrebe obavljanja poslova iz stavka (4) i stavka (5) ovog članka sklopiti ugovore sa drugim gospodarskim subjektima.

(8) Pravna osoba je dužna uz zahtjev za izdavanje uvjerenja za obavljanje energetske djelatnosti dostaviti ministarstvu ugovore s drugim pravnim osobama koji imaju utjecaja na stručnu osposobljenost pravne osobe za obavljanje energetske djelatnosti.“

Uz zahtjev za izdavanje uvjerenja za obavljanje energetske djelatnosti pravna osoba je dužna prema članku 11. Nacrta Pravilnika ministarstvu dostaviti sljedeću dokumentaciju:

- „a) dokaz da je registrirana za obavljanje energetske djelatnosti, te da nema zapreka za izdavanje uvjerenja iz članka 5. stavak (2),
- b) dokaz da je tehnički sposobna za obavljanje energetske djelatnosti,
- c) dokaz da je stručno osposobljena za obavljanje energetske djelatnosti,
- d) dokaz da je financijski sposobna za obavljanje energetske djelatnosti,
- e) Prijedlog Tarifnog sistema sa Metodologijom i kalkulacijom cijene usluge proizvodnje i isporuke toplotne energije, sa jasno definiranim normativima utroška energenata
- f) dokaz o uplati naknade za izdavanje uvjerenja koji se dostavlja naknadno nakon donošenja odluke Vlade Kantona Sarajevo sukladnu članku 33 pravilnika.

(2) Popis dokumentacije i dokaza za izdavanje uvjerenja nalazi se u Prilogu I. ovog pravilnika i njegov je sastavni dio.“

U Nacrtu Pravilniku je pored navedenog u poglavlju II *Izdavanje i produžavanje uvjerenja za obavljanje energetske djelatnosti* propisano: valjanost dokaza, donošenje rješenja kojim se izdaje ili odbija uvjerenje za obavljanje energetske djelatnosti, rok za donošenje rješenja, uvjerenje za obavljanje energetske djelatnosti, odustajanje od zahtjeva za izdavanje uvjerenja, obaveze energetskog subjekta i nadzor nad radom energetskog subjekata, produženje uvjerenja za obavljanje energetske djelatnosti, razdoblje produljenja važenja uvjerenja, stručno povjerenstvo za ocjenu ispunjavanju uvjeta za izdavanje uvjerenja, nadzor nad radom energetskog subjekta, otklanjanje nedostataka.

Nacrtom Pravilnika su također uređeni i propisani prestanak važenja uvjerenja za obavljanje energetske djelatnosti, registra uvjerenja za obavljanje energetske djelatnosti, naknada za izdavanje uvjerenja, kao i prijelazne i završne odredbe.

U obrazloženju Nacrta Pravilnika su navedeni razlozi za donošenje:

U dijelu V. Zakona o komunalnim djelatnostima ("Službene novine Kantona Sarajevo", br. 14/16, 43/16, 10/17 - Ispravka, 19/17, 20/18 i 22/19), člankom 13. stavak (1) propisani su uvjeti koje moraju ispunjavati davatelji komunalnih usluga za obavljanje komunalnih djelatnosti kako slijedi: da su registrirani za obavljanje komunalne djelatnosti; da posjeduju odgovarajuću opremu i sredstva za obavljanje komunalnih djelatnosti; da raspolazu odgovarajućim stručnim kadrovima koji mogu obezbjediti stalno i kvalitetno obavljanje komunalnih djelatnosti; da obezbjeđuju vršenje komunalnih djelatnosti sukladno odredbama ovog zakona i drugih propisa; da cijenu komunalnih usluga obrazuje prema važećim propisima; da utvrde normative rada i utroška materijalnih sredstava i omoguće kontrolu istih od strane nadležnih organa; da uspostave tarifni sistem koji će biti osnova za naplatu usluga; da kontinuirano rade na podizanju razine komunalnih usluga i unapređenju komunalnih djelatnosti.

Stavkom (2) članka 13. propisano je da na temelju naprijed navedenih dokaza o ispunjavanju uvjeta, nadležni organ za komunalne poslove Kantona, Grada i općine izdaje uvjerenje.

Člankom 4. stavak (4) Uredbe o općim uvjetima za proizvodnju, isporuku i korištenje toplotne energije ("Službene novine Kantona Sarajevo, broj 22/16, 4/23) određuje se obveza donošenja Pravilnika o uvjetima za obavljanje energetske djelatnosti proizvodnje i isporuke toplotne energije kojim se propisuju uvjeti za izdavanje, produljenje i prestanak važenja Uvjerenja za obavljanje energetske djelatnosti (u daljnjem tekstu uvjerenje), te oblik, sadržaj i način vođenja registra izdanih i oduzetih uvjerenja.

Uredbom je propisano da postupak izdavanja, produženja i prestanka važenja uvjerenja vodi **resorno** ministarstvo, odnosno Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo koje uspostavlja i vodi javni registar izdanih i oduzetih uvjerenja.

Davatelj usluge/energetski subjekt može obavljati energetske djelatnosti proizvodnje i isporuke toplotne energije sukladno sa Zakonom o komunalnim djelatnostima i Uredbom samo na osnovu izdanog uvjerenja o ispunjavanju uvjeta za obavljanje ove djelatnosti.

Uvidom u tekst dostavljenog propisa, uočena je potreba za pojašnjenjem odredbi iz čl. 5. i 8. Nacrta Pravilnika, zbog čega je Konkurencijsko vijeće aktom broj: 07-26-7-008-2/24 od 30.04.2024. godine zatražilo da se pojasni zašto je propisano da pravno lice ima upisanu pretežitu djelatnost (KD BiH 2010)-35.30 Proizvodnja i snabdjevanje parom i klimatizacija i šta to u praksi tačno znači, pojašnjenje pojmova „odgovarajuće tehničke struke“ i „dovoljan broj stručno osposobljenih radnika odgovarajuće kvalifikacije, te da li je nekim pravnim aktom već definirano i precizirano koji je to broj i koja je struka tehničkog osoblja sa kojim pravna osoba mora raspolagati prilikom obavljanje djelatnosti.

Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo je aktom „Pojašnjenje odredbi iz nacrta Pravilnika o uvjetima za obavljanje energetske djelatnosti proizvodnje i isporuke toplotne energije,„ zaprimljenim dana 10.06.2024. godine pod brojm: 07-26-7-008-4/24 navelo kako slijedi:

*„Pojašnjenje u svezi sa člankom 5.*

U nacrtu Pravilnika, člankom 5. stavak (1) - Opći uvjeti za obavljanje energetske djelatnosti propisano je da se Uvjerenje za obavljanje energetske djelatnosti izdaje pravnoj osobi koje je registrirano kod nadležnog suda za obavljanje energetske djelatnosti i ima upisanu pretežitu djelatnost prema trenutno važećoj Klasifikaciji djelatnosti Bosne i Hercegovine (KD BiH 2010) - 35.30 Proizvodnja i opskrba parom i klimatizacija.

Pravna osoba ne može započeti sa obavljanjem djelatnosti koja nije registrirana u nadležnom sudu. Prijava za registraciju sadrži pretežitu djelatnost subjekta upisa i druge podatke potrebne za provođenje postupka razvrstavanja pravne osobe prema klasifikaciji djelatnosti kod nadležnog organa za razvrstavanje subjekata po djelatnostima. Člankom 13. stavak a) Zakona o komunalnim djelatnostima propisuje se uvjet za obavljanje komunalnih djelatnosti - da Davatelji komunalnih usluga moraju biti registrirani za obavljanje komunalnih djelatnosti. U postupku donošenja Pravilnika komisija za izradu propisa, imenovana od strane Ministarstva je, izvršila uvid u javno dostupne podatke o registraciji pravnih osoba na području Kantona Sarajevo i ustanovila da su neka od pravnih osoba koja su iskazala interes za podnošenje zahtjeva za izdavanje Uvjerenja registrirana za obavljanje pretežite djelatnosti:

- C 10.32 - Proizvodnja sokova od voća i povrća
- L 68.10 - Kupnja i prodaja vlastitih nekretnina;
- F 43.22 - Uvođenje instalacija vodovoda, kanalizacije i plina i instalacija za grijanje i klimatizaciju
- E 36.00 - Skupljanje, pročišćavanje i opskrba vodom
- M 71.12 - Inženjerstvo i s njim povezano tehničko savjetovanje;

Niti jednu od navedenih ne prepoznaje Zakon o komunalnim djelatnostima, niti Zakon o regulaciji energetske djelatnosti u Federaciji BiH.

*Pojašnjenje u svezi sa člankom 8. stavak (5).*

Tijekom javnih konsultacija u svezi sa nacrtom Pravilnika i razmatranja prijedloga za izmjene i dopune u članku 8. stavak (3) izvršena je izmjena kako bi se precizirale potrebne kompetencije tehničkog rukovodioca, pa je tako stavak (3) koji je glasio:

„Pravna osoba iz stavka (1) mora imati najmanje jednog tehničkog rukovodioca koji mora biti diplomirani inženjer odgovarajuće tehničke struke koji posjeduje neophodno znanje iz oblasti

projektovanja, izgradnje, pogona i održavanja termoenergetskih objekata za proizvodnju i distribuciju toplotne energije sa položenom stručnom ispitom iz odgovarajuće oblasti.“, u konačnoj verziji teksta usvojen je prijedlog iz javnih konsultacija o nacrtu, te ovaj stavak glasi: „Pravna osoba iz stavka (1) mora imati najmanje jednog telmičkog rukovodioca, magistra ili diplomiranog inženjera mašinske struke, koji posjeduje neophodno znanje iz oblasti projektovanja, izgradnje, pogona i održavanja termoenergetskih objekata za proizvodnju i distribuciju toplotne energije sa položenom stručnom ispitom iz jedne od oblasti: energetika, procesna tehnika ili klimatizacija, grijanje i hlađenje.“

#### *Pojašnjenje u svezi sa korištenjem termina "dovoljan broj"*

Dovoljan broj stručno osposobljenih radnika odgovarajuće kvalifikacije znači da energetski subjekt mora angažirati dovoljan broj uposlenika odgovarajuće kvalifikacije odgovornih za rad i nadzor nad radom toplifikacionog sustava kojim se obavlja energetska djelatnosti odnosno osigurati kontinuirano pružanje usluge korisnicima sukladno sa zakonskim propisima, standardima i tehničkim propisima i pravilima struke, a sa osnovnom svrhom osiguranja dugoročnog obavljanja energetske djelatnosti na održiv način.

Dovoljan broj uposlenika odgovarajuće kvalifikacije za slučaj proizvodnje toplotne energije nije propisan zakonskim propisima. Podzakonskim propisom i tehničkim pravilima u oblasti gasne tehnike propisane su kvalifikacije uposlenih u specifičnim slučajevima. Sličan slučaj je u oblasti proizvodnje toplotne energije u slučaju postrojenja sa kotlovima za proizvodnju pare visokog pritiska, odnosno u kojem se koriste posude pod pritiskom i tehničkim propisima u oblasti elektroenergetike takoder. Nadzor i kontrola u spomenutim slučajevima je već uspostavljena odgovarajućim zakonskim i provedbenim propisima, a nadležnost za nadzor poštivanja propisa imaju inspekcijски organi na razini BiH, FBiH i jedinica lokalne samouprave ali i posebna radna tijela ili stručni komiteti zaduženi za specifične poslove i/ili tehničke discipline.

Prema tome, dovoljan broj kvalifikovanih zaposlenika odgovornih za rad i nadzor nad radom toplifikacionog sustava je ovom slučaju pitanje učinkovite organizacije obavljanja djelatnosti (ponovićemo, sa svrhom dugoročnog osiguranja obavljanja djelatnosti) na šta utjecaj imaju korištena tehnologija, instalirana oprema, režim rada postrojenja, te u nekim slučajevima specifični zahtjevi proizvođača opreme i tehnologije. Obzirom na veoma veliki izbor tehnologija i opreme koja se koristi ili se može koristiti za potrebe proizvodnje toplotne energije niti je primjenjivo, niti racionalno pokušati propisati uvjete za svaki mogući pojedinačni slučaj. Osim toga, propuštanjem navođenja nekog od mogućih tehnoloških rješenja, za posljedicu će imati nemogućnost apliciranja pravne osobe za izdavanje Uvjerenja (dozvole za rad) što potencijalnog aplikanta stavlja u nepovoljan položaj i u smislu Zakona o konkurenciji BiH.

Za vašu informaciju, i kao jedan primjer, navešćemo da su u uporabi već dulje vrijeme i postrojenja za proizvodnju toplotne energije (raznolikog tehnološkog rješenja i potrebnih kompetencija za upravljanje i održavanje) koja su u potpunosti automatizirana bez potrebe za angažiranjem uposlenika u samom postrojenju sa kontrolom i vođenjem procesa koje obavlja proizvođač i isporučitelj opreme sukladno sa ugovorom sa vlasnikom postrojenja tražiteljem uvjerenja. U ovom slučaju "dovoljan broj" stručno osposobljenih radnika u članku 8. stavak (4) je "nula". Slično važi i u stavku (5) jer u nekim slučajevima, a ponovo u ovisnosti od vrste postrojenja održavanje vrši isključivo isporučitelj/proizvođač opreme, odnosno pravna osoba posebno ovlaštena i osposobljena za te poslove.

Ispunjavanja obveze iz članka 8. predviđeno je putem verifikacije dostavljene dokumentacije iz Priloga I, točka 3. i točka 4. od strane Stručne komisije iz članka 20. te provođenjem nadzora propisanog člankom 21. i 22. se krajnjom sankcijom oduzimanja Uvjerenja.“

Konkurencijsko vijeće je dana 18.06.2024. godine pod brojem: 07-26-7-008-5/24 zaprimilo Prijedlog Pravilnika o uvjetima za obavljanje energetske djelatnosti proizvodnje i isporuke toplotne energije (u daljnjem tekstu: Prijedlog Pravilnika), koji je Ministarstvo komunalne privrede, infrastrukture, prostornog uređenja, građenja i zaštite okoliša, kao predlagač, dostavilo na mišljenje sukladno odredbama članak 25. stavak (2) Zakona o konkurenciji.

Naime, radi se o podzakonskom aktu, kojim se propisuju uvjeti i postupak za izdavanje, produljenje i prestanak važenja Uvjerenja za obavljanje energetske djelatnosti, koji je prvobitno Konkurencijskom vijeću bio dostavljen u formi nacрта, te nakon okončanih konsultacije i uvrštenih mišljenja i sugestija sudionika na konsultacijama dostavljen je konačni Prijedlog Pravilnika na mišljenje. U svrhu utvrđivanja izmjena u tekstu propisa, urađena je uporedna analiza Nacrta i Prijedlog Pravilnika, i utvrđeno sljedeće:

Odredba članak 5. stavak (1) Nacrta Pravilnika koja propisuju da se Uvjerenje za obavljanje energetske djelatnosti izdaje se pravnoj osobi koja je registrirana kod nadležnog suda za obavljanje energetske djelatnosti i ima upisanu pretežitu djelatnost prema trenutno važećoj Klasifikaciji djelatnosti Bosne i Hercegovine (KD BiH 2010) - 35.30 Proizvodnja i opskrba parom i klimatizacija, je u Prijedlogu Pravilnika izmijenjena na način da je izbrisana riječ pretežita, pa glasi:

„Uvjerenje za obavljanje energetske djelatnosti izdaje se pravnoj osobi koja je registrirana kod nadležnog suda za obavljanje energetske djelatnosti i ima upisanu djelatnost prema trenutno važećoj Klasifikaciji djelatnosti Bosne i Hercegovine (KD BiH 2010) - 35.30 Proizvodnja i opskrba parom i klimatizacija“

Članak 7. stavak (1) Nacrta Pravilnika koji je glasio: „Pravna osoba je tehnički sposobna za obavljanje energetske djelatnosti ukoliko raspolaže toplifikacionim sustavom, te uporabnom dozvolom i drugom dokumentacijom prema propisima kojima se uređuje područje prostornog uređenja i građenja na temelju kojih se toplifikacioni sustav može staviti u pogon i koristiti za obavljanje energetske djelatnosti“ izmijenjen je i sada glasi :

“Pravna osoba je tehnički sposobna za obavljanje energetske djelatnosti ukoliko raspolaže toplifikacionim sustavom, okolinskom dozvolom, odobrenjem za uporabu i drugom dokumentacijom prema propisima kojima se uređuju kvalitetu zraka, oblast zaštite okoliša i oblast prostornog uređenja i građenja na temelju kojih se toplifikacioni sustav može staviti u pogon i koristiti za obavljanje energetske djelatnosti“

Članak 8. stavak (1) Nacrta Pravilnika je propisivao „Pravna osoba je stručno osposobljena za obavljanje energetske djelatnosti ako zapošljava dovoljan broj stručno osposobljenih radnika za obavljanje energetske djelatnosti i/ili ima zaključene ugovore sa drugim pravnim osobama stručno osposobljenim za obavljanje energetske djelatnosti“, izmijenjen je tako što je izbrisana riječ dovoljan i pa sada ovaj član u Prijedlogu Pravilnika glasi:

„Pravna osoba je stručno osposobljena za obavljanje energetske djelatnosti ako zapošljava broj stručno osposobljenih radnika za obavljanje energetske djelatnosti i/ili ima zaključene ugovore sa drugim pravnim osobama stručno osposobljenim za obavljanje energetske djelatnosti.“

Stavak (3) istog članka Nacrta Pravilnika je izmijenjen i sada u Prijedlogu Pravilnika glasi:

„Pravna osoba iz stavka (1) mora imati najmanje jednog tehničkog rukovodioca, magistra ili diplomiranog inženjera mašinske struke, koji posjeduje znanje iz oblasti projektovanja, izgradnje, pogona i održavanja termoenergetskih objekata za proizvodnju i distribuciju toplotne energije sa položenim stručnim ispitom iz jedne od oblasti: energetika, procesna tehnika ili klimatizacija, grijanje i hlađenje.“

U članku 17. stavak (3) Nacrt Pravilnika je bilo propisano da je energetski subjekt u obvezi da do 31. svibnja tekuće godine a najkasnije 15 dana po završetku sezone grijanja resornom ministru dostavi Informacije o protekloj sezoni i planu priprema za predstojeću sezonu, a u

Prijedlogu Pravilnika je propisano da dostavlja Izvješće o radu u protekloj sezoni i Plan priprema za predstojeću sezonu.

Članak 22. stavak (1) točka b) Nacrta Pravilnika koja glasi: “ ako se u postupku nadzora utvrdi nesavjesno obavljanje energetske djelatnosti“ je brisana u Prijedlogu Pravilnika, pa su tako točke c), d), e) i f), sada točke b), c), d) i e).

Konačnim Prijedlogom Pravilnika nije propisano kada i pod kojim uvjetima se vrši predaja objekta, mreže i uređaja na upravljanje drugom subjektu, dok je isto bilo propisano u članku 25. Nacrta Pravilnika.

Sukladno članku 25. stavak (2) Zakona o konkurenciji, Konkurencijsko vijeće na nacрте i prijedloge zakona i drugih propisa iz oblasti koje imaju utjecaja na tržišnu konkurenciju, daje mišljenje o njihovoj usuglašenosti sa ovim zakonom.

Shodno navedenom, Konkurencijsko vijeće je razmotrilo dostavljeni konačni Prijedlog Pravilnika i ocijenilo da ne sadrži odredbe koje mogu sprječavati, ograničavati ili narušavati tržišnu konkurenciju na mjerodavnom tržištu Bosne i Hercegovine, u smislu odredbi Zakona o konkurenciji, odnosno isti je usuglašen sa Zakonom o konkurenciji.

Ovo mišljenje je dano isključivo na temelju podataka dostavljenih uz zahtjev za mišljenje na Prijedlog Pravilnika o uvjetima za obavljanje energetske djelatnosti proizvodnje i isporuke toplotne energije, te ukoliko isti odstupa od stvarnog činjeničnog stanja ovo mišljenje se ne može primijeniti.

**Predsjednica**

**Adisa Begić**

**Dostavljeno:**

- **Podnositelju zahtjeva**
- **U spis**